

आकाशवाणी

खबरां नाटयपाल सिंह कोला

1. प्रधानमंत्री नरेन्द्र मोदी होरें जीवन च असानी ते कारोबार गी सखल्ला बनाने लेई अगली पीढ़ी दे सुधारें दी कार्य-योजना दा जायजा लैता।
2. विदेश मंत्री डॉ. एस. जयशंकर होरें चीन दे विदेश मंत्री वांग ही होरें गी आखेआ जे आतंकवाद दे सब्बै रूपें खलाफ लड़ाई भारत दी मुख प्राथमिकता ऐ।
3. अमरीका दे राष्ट्रपति डोनाल्ड ट्रंप होरें घोषणा कीती ऐ जे ओह यूक्रेन युद्ध समाप्त करने च मदाद लेई रूस ते यूक्रेन दे राष्ट्रपतियें बश्कार आमने-सामने दी बैठक दा बंदोबस्त करंगन।
4. मौसम मैहकमे नै कर्नाटका, गुजरात, मध्य महाराष्ट्र, कोंकण ते गोवा च अज्ज बड़ी भारी बरखा सरबन्धी रेड अलर्ट आहली चेतावनी जारी कीती ऐ।
5. 16मीं एशियाई निशानेबाजी प्रतियोगिता च गिरीश गुप्ता नै 10 मीटर एयर पिस्टल वर्ग च सोने दा तगमा जितेआ ऐ।

6. ते टेनिस च विश्व नंबर 2 खडारी कार्नोस एलकराज नै पिछली बार दे चैंपियन जैनिक सिन्नर दे कसरी होने कारण रिटायर्ड होने करी ओहियो च अपना पैहला सिनसिनाती ओपन खिताब जिती लैता ऐ।

<><><><><><>

PM-Higi Level Meeting

प्रधानमंत्री नरेन्द्र मोदी होरें अगली पीढ़ी दे सुधारें दी कार्य-योजना दा जायजा लैने लेई कल इक्क उच्ची सतह दी बैठक कीती जेदे तैहत जीवन जीने च असानी, कारोबार गी सखल्ला बनाना ते समग्र खुशहाली दे उपाएं पर विशेष रूप कन्नै ध्यान दिता गेआ। प्रधानमंत्री होरें गी शासन च सरलता, आर्थिक वृद्धि गी मजबूती देने ते इनें उपाएं कन्नै नागरिकें आस्तै सिद्धा लाह सुनिश्चित करने दे उपाएं दी जानकारी दिती गेई। श्री मोदी हुंदे स्वतंत्रता दिवस संबोधन दे मगरा एह उच्चस्तरीय बैठक बुलाई गेई जेदे च प्रधानमंत्री होरें जीएसटी सुधारें ते टैक्स घट्ट करने दे रूप च देआली दे तोहफे दा वादा कीता हा। बैठक मगरा प्रधानमंत्री होरें सोशल मीडिया प्लेटफार्म एक्स पर आखेआ जे सरकार सब्बै खेतरे च सुधार लागू करने लेई बचनबद्ध ऐ।

<><><><><><>

Foreign Minister Terrorism

विदेश मंत्री एस जयशंकर होरें आखेआ ऐ जे मौजूदा अंतरराष्ट्री माहौल च वैश्विक अर्थबवस्था च स्थिरता कन्नै वृद्धि बड़ी जरूरी ऐ। उनें गलाया जे भारत

इक्क निरपक्ख, संतुलित ते बहुआयामी विश्व बवस्था दा पक्षधर ऐ। उनें आखेआ जे संशोधित बहुपक्षवाद अज्ज दी लोड़ ऐ। डॉ. जयशंकर होरें चीन दे विदेश मंत्री वांग यी हुंदे कन्नै गल्लबात च इस गल्ला पर जोर दिता जे आतंकवाद दे सब्बै रूपे खलाफ लड़ाई भारत दी मुख प्राथमिकता ऐ। दौनें लीडरें बशकार आर्थिक ते बपारिक सरबंधे, तीर्थ जात्राएं, लोके-लोके बशकार सरबंध, नदिएं दे आंकड़े सांझा करने ते दपक्खी आदान-प्रदान समेत कई मुद्दे पर चर्चा होई। डॉ. जयशंकर होरें आखेआ जे भारत-चीन सरबंधे गी आपसी समान, संवेदनशीलता ते आपसी हित दे आधार पर निर्देशित होना लोड़चदा ऐ।

<><><><><><>

Trump-Zelensky

अमरीका दे राष्ट्रपति डोनाल्ड ट्रंप होरें घोषणा कीती ऐ जे ओह यूक्रेन युद्ध समाप्त करने च मदाद लेई रूस ते यूक्रेन दे राष्ट्रपतिये बशकार आमने-सामने दी बैठक दा बंदोबस्त करंगन। अपने सोशल मीडिया प्लैटफार्म पर श्री ट्रंप होरें आखेआ जे कल रातीं व्हाइट हाउस च यूक्रेन दे राष्ट्रपति वोलोदिमीर जेलेस्की ते होर यूरोपी नेताएं दी मेजबानी दे बाद उनें रूस दे राष्ट्रपति पुतिन हुंदे कन्नै गल्लबात कीती। ट्रंप होरें आखेआ जे उनें राष्ट्रपति पुतिन ते जेलेस्की बशकार बैठक दी तैयारियां शुरू करी दित्तियां न जेदे च थाहर दी घोषणा बाद च कीती जाग। ट्रंप होरें गलाया जे पुतिन-जेलेस्की वार्ता दे बाद त्रिपक्षीय बैठक च ओह बी शामिल होंगन।

<><><><><><>

Trump-EU

यूरोपीय नेताएं व्हाइट हाउस च यूक्रेन दे राष्ट्रपति वोलोदिमीर जेलेन्स्की हुंदे कन्नै उंदी मेजबानी आस्तै अमरीका दे राष्ट्रपति डोनाल्ड ट्रम्प हुंदी सराहना कीती ऐ। इनें नेताएं इस प्रयास गी यूक्रेन युद्ध खत्म करने दी दिशा च महत्वपूर्ण गें दस्सेआ। बैठक दरान ट्रंप होरें सुरक्षा यूक्रेन दी मंग पर राष्ट्रपति जेलेन्स्की होरें गी मजबूत सुरक्षा दा भरोसा दोआया। ब्रिटेन दे प्रधानमंत्री कीर स्टारमर होरें आखेआ जे बैठक यूरोप दी सुरक्षा आस्तै ऐतिहासिक आक्खी जाई सकदी ऐ। उनें आखेआ जे राष्ट्रपति ट्रम्प हुंदा आश्वासन नाटो दे आर्टिकल 5 दे मूजब सामुहिक सुरक्षा दा भरोसा दोआंदा ऐ। आर्टिकल-5 च उल्लेख ऐ जे नैटो संगठन दे कुसै बी इक्क मुख्य खिलाफ हमला सब्बै सदस्ये मुल्खें पर हमला मन्नेआ जाग। नाटो प्रमुख मार्क रूट होरें सुरक्षा गरंटी लेई राष्ट्रपति ट्रंप हुंदे समर्थन गी बैठक दी इक बड़्डी सफलता दस्सदे होई गतिरोध खत्म करने ते राष्ट्रपति पुतिन होरें गी गल्लबात तोड़ी लेआने दा श्रेय दिता।

<><><><><><>

IMD

मौसम विभाग नै अज्ज कर्नाटक, गुजरात, मध्य महाराष्ट्र, कोंकण ते गोवा च बड़ी मती तेज बरखा दा रेड अलर्ट जारी कीता ऐ। विभाग नै छत्तीसगढ़, केरल, माहे, तेलंगाना ते विदर्भ च बी भारी थमां मती भारी बरखा दी मेद दस्सी ऐ।

मौसम विभाग नै तटीय आंध्र प्रदेश, पूर्वी राजस्थान, हिमाचल प्रदेश, जम्मू ते कश्मीर, लद्दाख, गिलगित-बाल्तिस्तान, मुजफ्फाबाद सने पूर्वोत्तर भारत च बी भारी बरखा होने दी मेद ऐ। विभाग नै एह् बी दस्सेआ ऐ जे अगले 3 थमां 4 दिनें दरान दक्खनी प्रायद्वीप ते ओदे कन्नें लगदे मध्य भारत च मानसून सक्रिय रौहने दी मेद ऐ।

<><><><><><>

NDA-Radhakrishnan

राश्ट्रीय जनतांत्रिक गठबंधन एनडीए दे उपराश्ट्रपति औहदे दे मेदवार सी.पी राधाकृष्णन बुधवार गी अपना नामांकन दाखल करडन। राधाकृष्णन होरें नमी दिल्ली च एनडीए दे संसदीय दल दे नेताएं कन्नें इक शिष्टाचार बैठक लाई। एहदे मगरा पार्लियामानी मामलें दे मंत्री किरण रिजिजू होरें आखेआ जे सारे एनडीए नेता नामांकन दाखिल करने दे मौके पर मौजूद रौहडन। उनें आखेआ जे एनडीए संसदीय दल दी बैठक होग। एहदे च सारे नेताएं दा सी.पी राधाकृष्णन हुंदे कन्नें औपचारिक परिचय करोआया जाग।

<><><><><><>

Chasoti-Death Toll

किश्तवाड़ जिले दे चशौती गांs च बदल फट्टने मगरा कल 5में रोज बी मलबे हेठ दबोए दे लोकें गी कड्डने दा कम्म बरोबर जारी रेआ। पिछले हफ्ते होई दी इस कुदरती करोपी करी प्रभावित होए दे लोकें गी प्रशासन आसेआ हर चाल्ली

दी मदाद उपलब्ध करोआई जा'रदी ऐ। आकाशवाणी दे जम्मू संवाददाता नै जानकारी दिती ऐ जे मरने आहलें दी गिनतरी 62 पुज्जी गई ऐ जिल्लै के पुलस आसेआ दिती गेदी जानकारी मताबक 41 लोक अजें बी लापता न। जम्मू-कश्मीर विधानसभा च विपक्ष दे नेता सुनील शर्मा जेड़े जम्मू दे डिविजनल कमिशनर ते आई.जी.पी जम्मू हुंदे सने घटना आहली थाहरा पर मौजूद न। उनें आखेआ जे एह कुदरती करोपी कन्नै बड़ा मता नुकसान पुज्जा ऐ।

<><><><><><>

Asian-Shooting Championship

कजाखस्तान दे शिमकेंत च 16मीं एशियाई निशानेबाजी प्रतियोगिता च भारत दे गिरीश गुप्ता नै 10 मीटर एयर पिस्टल मुकाबले च सुन्ने दा तगमा जिती लैता ऐ। गिरीश नै फाइनल च 241 अशारिया 3 अंक हासिल कीते। भारत दे गै देव प्रताप नै 238 अशारिया 6 अंक कन्नै चांदी दा तगमा जितेआ। भारत नै पैहले दिन 2 सुन्ने दे ते 3 चांदी दे तगमे जिते। कपिल बैसला नै जूनियर पुरुष एयर पिस्टल च सुन्ने दा तगमा जितेआ।

<><><><><><>

Tennis

टेनिस च दुनिया दी दुई वरीयता हासिल टेनिस खडारी कार्लोस अल्कराज नै अपना पैहला सिनसिनाती ओपन खिताब जिती लैता ऐ। कल ओहियो च मौजूदा चैंपियन ते विश्व दी पैहली वरीयता दे खडारी यानिक सिनर नै 0-5 कन्नै

पिछड़ने मगरा सेहत ठीक नेई होने करी खेड्ठ थवां हटी जाने दा फैसला लैता ऐ। खेड्ठ छड़ा 23 मिनटें तगर गै चलेआ। कार्लोर्स अल्काराज, कार्लोर्स मोया ते राफेल नाडाल मगरा एह् खिताब जित्तने आहले स्पेन दे त्रीए खडारी बनी गए न। एह् उन्दे करियर दा 22मां खताब ऐ।

<><><><><><>

Archery-World Championship

कनाडा दे .. च विश्व युवा तीरंदाजी चैंपियनशिप अज्जा थमां शुरू होआ करदी ऐ। एह्दे च भारत दा 24 सदस्यें दा दल हिस्सा लैग। प्रतियोगिता 24 अगस्त गी सम्पन्न होग। एह्दे च 63 देशें च 570 तीरंदाज हिस्सा लैडन। आयरलैंड दे लिमरिक च पिछले संस्करण च भारत नै 6 सुन्ने सने 11 तगमे हासिल कीते ते शीर्ष थाहर पर रेआ हा।

<><><><><><>